



## **INTERVENCIÓN NEL PLENU DEL CONCEYU DE XIXÓN DECLARACIÓN INSTITUCIONAL EN DEFENSA DE LA OFICINA DE NORMALIZACIÓN LLINGÜÍSTICA Y LES POLÍTQUES DE NORMALIZACIÓN**

27 de febreru de 2019

*Inaciu Galán, Presidente d'Iniciativa pol Asturianu*

Sra. alcaldesa, srs. conceyales, sr. secretariu, mui bones tardes:

Nel mio nome y nel d'Iniciativa pol Asturianu quiero agradecer al plenu d'esti Conceyu que mos reciba güei pa esponer les razones de la nuesa propuesta de Declaración Institucional en defensa de la Oficina de Normalización Llingüística y de la Ordenanza y el Plan de Normalización.

Pocos díes dempués de la celebración en tol mundu, y tamién en Xixón, del Día Internacional del Idioma Maternu, paez mui positivo que'l plenu d'esti conceyu dedique un tiempu a falar de les midíes de protección de la que ye llingua materna d'una parte importante de la so población: l'asturianu.

Va unos meses pudimos sentir na prensa ataques que consideremos graves al llabor desarrolláu en Xixón nel ámbitu de la normalización llingüística. Y paecíanos importante qu'esti plenu reafirmara la so posición hestórica de sofitu institucional consensuáu a estes polítiques, coincidiendo especialmente colos primeros quince años de funcionamientu de la Oficina de Normalización Llingüística.

Nel añu 2008, va yá más d'una década, aprobóse nesti salón de plenos una ordenanza que señala que l'asturianu y el castellán son les llingües propies de Xixón y que garantiza que naide pueda ser discrimináu por usar una o otra, asina como qu'esta institución diba trabayar por da-y normalidá a la presencia del asturianu en tolos ámbitos.

Pero esa declaración d'intenciones espeyada nun testu llegal, nun sedría más qu'eso, intenciones, ensin la puesta en marcha de midíes de promoción y normalización. Y pa ello faense necesarios los planes de normalización y profesionales que colaboren de forma tresversal pa poner en marcha les midíes que se deciden en cada mandatu.

Y no está reñido de ninguna manera, la defensa de la lengua asturiana con el respeto y el cariñu por el castellano, como lengua tamién nuestra. Porque los derechos ciudadanos para que podamos expresarnos en asturianu, y para que nuestras instituciones se expresen tamién en esta lengua, y la difundan, promuevan y cuiden, son perfectamente compatibles con el derechos de los ciudadanos y ciudadanas a usar el castellano. Nadie pone en cuestión esto.

La gran diferencia ye que l'asturianu, pola so suerte hestórica, pola persecución que vivieron los sos falantes, y pola falta d'un reconocimientu d'oficialidá, precisa d'un mayor apoyu y visibilidá dende les instituciones, faciendo por poner el so usuy lo más cerca posible de la normalidá cola que siempre apaez nos ámbitos informales y privaos, tamién nos espacios públicos, formales y oficiales.

Por eso existen la Oficina de Normalización Llingüística y la Ordenanza, por eso esiste un Plan de Normalización, y por eso ye necesario que los y les represenantes públicos manden mensaxes positivos sobre l'asturianu y la so normalización, y tamién, claro ta, qu'usen l'asturianu n'actos públicos de forma habitual y con normalidá.

Y ye importante, porque esti patrimoniu cultural que tenemos los asturianos y asturianas, vien diciéndonoslo la UNESCO, la ONU, el Conseyu d'Europa... requier mayor protección y más midíes que garanticen que se tresmita nes families, que s'enseña nes escueles y que se visibilice en tolos ámbitos. Y ello forma parte de les competencias de los conceyos, tal y como establez l'artículu octavu de la Llei d'Usu del asturianu, aprobada en 1998, precisamente amás pol impulsu d'un gobiernu del PP, presidíu por Sergio Marqués.

Por eso pidimos a esti plenu que demuestre'l so compromisu col cumplimientu de la Ordenanza de Normalización. Y pidimos tamién esi mesmu sofitu al llabor de la Oficina de Normalización Llingüística y a los y les trabayadores de so. Porque vienen siendo una ferramienta necesaria y útil pa poner en marcha les midíes que señalen la Ordenanza y los planes. L'últimu d'estos planes, aprobáu por ciertu con una amplísima mayoría de los grupos representaos nesti plenu, ye un modelu pa otros conceyos asturianos y tuvo los sos frutos, gracias al papel de gobiernu, oposición y tamién sociedá civil.

Toos y toes xuntos trabayamos pa sacar alantre midíes dende'l Conseyu Asesor de Normalización Llingüística, onde entidaes como Iniciativa pol Asturianu, asociaciones culturales, de vecinos y comerciantes, sindicatos y otres entidaes, trabayamos de forma altruista pa proponer acciones y apoyar l'acción institucional.

Por eso pidimos respetu a esti llabor, porque ye un llabor tamién de tola sociedá. Por eso pidimos respetu a la llingua asturiana y a la so normalización, porque ye un patrimoniu común y que nun tendría d'usase como elementu de confrontación política.

Pidimos que se siga construyendo un clima de consensu y respetu al rodiu del idioma. Que se sigan llevando alantre les midíes acordaes y necesaries. Al nuesu paecer habría facese más rápido, anque reconocemos que, en xeneral, vienen dándose pasos alantre. Y nun se pue negar que fueron mui bien acoyíos pola sociedá xixonesa.

La protección de les llingües d'España ye un consensu presente na sociedá y nes instituciones dende los tiempos de la Transición. Y nun ye namás una voluntá política d'un partíu o dellos, sinón que ye un mandatu constitucional.

La Constitución española protexe toles llingües, les oficiales, como esperamos que pronto seya l'asturianu, pero tamién les que tienen otros graos de protección, como ye'l casu nesti momentu. Nun tamos güei equí discutiendo sobre la conveniencia de la oficialidá, qu'esti plenu yá sofitó con una amplia y tresversal mayoría nel mes de payares de 2017. Güei lo que tamos pidiendo ye un sofitu explícitu a seguir avanzando nes polítiques de normalización.

Pa rematar, quiero dexar claro qu'esta propuesta de declaración que facemos nun ye contra naide nin contra nengún grupu d'esta institución, sinón que quier precisamente sumar. Facemos un llamáu a tolos grupos políticos equí representaos pa dar güei un exemplu de consensu alreduro d'un elementu patrimonial de la importancia d'un idioma y la cultura que lu acompaña.

Tengamos una visión a llargu plazu, una visión xenerosa, trabayemos xuntos nesta defensa del patrimoniu cultural y llingüísticu de Xixón, d'Asturies, y tamién d'España, como lo ye del mundu, pa que nun se dea la situación na que tengamos de dar esplicaciones a los nuestos nietos cuando nos pregunten por qué nun ficimos dalgo cuando tovía se podía salvar l'asturianu.

Gracies pol so tiempu.